

•sanjvwnz•

Seiz Iq Nanz Lumz

难忘儿时

□ Lij Veimeiz / 李会梅

Henz suenmak baihoeng, miz aen daemz he, ngoenznaengz cuengq-hag le, gyoengq lwgnyez cungj gyaenz roengz daemz bae youzraemx guh-angq. Raemxdaemz yienznaeuz laeg, hoeng ndawmbanj lwgnyez sai mbwk bouxboux cungj rox youzraemx ndaemraemx.

Henzdaemz gonimhenj, miz nga he iet roengz lajdaemz daemj raemx lo. Gyoengq lwgnyez ciengzciengz duengh nye nimhenj, benz hwnj gonimhenj, ndonj haeuj ndaw suenmak bae caeg lwgmak gwn.

Laeng mbanj miz geij bak moux ndoeng faexcoengz, moix bi seizdoeng fwndoek aemq seiz, ndawndoeng dauqawq hwnj miz raet gak cungj gak yiengh. Ndawmbanj bouxlaux lwgnyez, bouxboux cungj rox dujraet lawz gwn ndaej, dujraet lawz gwn mbouj nbaej.

Ngoenz he haetromh ranz ngamq ronghcingx, bouxlaux lwgnyez couh ra ndaej lamz raet he dauqranz cuengq le, bouxlaux cij bae guhhong, lwgnyez cij bae hagdangz. Mwhhaenx ngoenz sam donq daihgaya cungj dwg cawj raet daeuj dang haeux gwn.

Geiq ndaej bi 1976 seizdoeng, gou ngamq ndaej roek bi seiz, ndawmbanj cibgeij boux lwgnyez haj

roek bi, heuh dah cihcingh Vangz lauxsae son dou ciengq go, diuqfoux caeuj gangj gojgaeq.

Miz ngoenz he fwn gvaq ndit rongh, Vangz lauxsae daiq dou bae ndoeng laeng mbanj cetyouz. Raen miz haujlai raet hausaksak, dou couh angqvauvau gip raet hawj Vangz lauxsae.

Mwhhaenx ndawmbanj dou miz gouj boux cihcingh, seiq dah haj daeg, seiq dah cihcingh couh youq ranz gou ninz.

Haemhhaenx gwn caeuz sat, Vangz lauxsae heuh gou bae caeuj de ninz. Daengz gyanghwnz gou nyoh rad heuh Vangz lauxsae, mbouj nyi de doengh, ndawrug laepsaengsaeng youh mbouj miz daeng, gou nyoh gaenj couh daejnga'nga hwnjdaej. Daxmeh dingqnyi sing daej gou, couh hwnq-daeuj heuh Vangz lauxsae hai dou, hoeng mboujguenj daxmeh baenzlawz hemq, hix mbouj miz saek dah cihcingh ndiu gvaqdaej.

Yaep he, gou dingqnyi rog dou sing gangj nauhyied sadsad, aen dou deng geuh haeujdaej lo. Gou yawj-raen daxboh diemj aen daeng youz-haeu he, duicangj caeuj geij boux boh'au byaij haeuj rug daej, raen geij dah cihcingh gaenq heuj dox-

caemq, baenzlawz ngauz hix ngauz mbouj ndiu lo.

“Gyoengqde gwn raet dengdoeg lo, vaiq bae ra haexma caeuj youz duhdaem daeuj guenq.” Duicangj saetsing naeuz. Daihgaya doq ning hwnjdaej, gou dingq le deng hwk ndaej nyoh rih dangzvaq mbaeq-mbatmbat.

Haemhhaenx daengx mbanj bouxlaux nyaengqfoedfoed caeuj canghyw itheij daej bang gyoengq dah cihcingh gejdooeg, baenzhwnz mbouj ndaej ninz.

Haet daihngaih, Vangz lauxsae soengq gou diuz vinj vahoengz he, de naeuz: “Dahmeiz, docih mwngz lo, danghnaeuz haemhlwenz mbouj miz mwngz, dou couh mbouj miz mingh lo.”

Gou song fwngz ciepeu geu vinj Vangz lauxsae, sim'angq youh ndaeng soemj, raemxda venj rim gwnznaj, daejfwtfwt naeuz: “Docih Vangz lauxsae, neix dwg diuz vinj daih'it gou, caemhcai dwg diuz vinj daih'it mbouj miz benq nyib.”

.....

“Daxmeh, dauqranz lo.” Dahlwg gou heuh sing he, gou cij fwtf singj gvaqdaej, gwnznaj gou gaenq venj miz song roix raemxda, gou laeglemx uet bae, fwngz riu daeh byaek lw, caeuj gyoengqde byaij ok bouq gwn caeuz bae.

Seizneix gwndaenj caeuj seiz lwgnyez gou doxbeij, caen dwg ca ndaej lumj mbwn caeuj dieg.

Gou doq byaij ndawsim doq ngon: “Dangj yinghmingz lingjdaej, Laux nyaeq gwndaenj raeuj, Gaijgwz hailangh daej, Guek raeuz bienqsadsad.

Docih gungcanjdangj, Hawj bouxmbanj baenzfouq, Ranzranz miz laeuz youq, Gwn mbouj you mbouj heiq.”
(2 sat)



Doenghnaz Sanhgyangh lumj buenzsaekveh.

Gungh Bujganh ingj

•Sawcuenhraz Lwgnyez•

Gij Golwngnyez Henz Dahhoengz

红水谣

□ Lanz Haijyangz Moz Beibei / 蓝海洋 莫蓓蓓

Bakdou ranz Aulungzgeiz hai dwk, de lij youq ranz, gou laeglemx byaij daengz bakdou, cingq siengj haibak heuh de, sawqmwh ndaejnyi de youq ndawranz swenj sing he, hwk ndaej gou doq ndoj haeuj henzdou bae.

“Okbae! Gaej haeuj ndawranz gou daej!”

Gij sing swenj Aulungzgeiz dungxliengz raixcaix, dwg mbouj dwg de youh gwn laeuj lo? Lwgda de raih lai lo, gou ndoj youq henzdou mbouj gamj diemheiq, caen siengj doq buetdeuz lizbae.

“Lij ndwn youq gizneix guh maz? Deuz ha! Vaiqdi!”

Aen sim gou diuqbubbub, cingq yaek yamq din buetdeuz, fwtf ndaejnyi ndawranz miz bouxwnq gangj vah, gou sikhaek daengx roengzdaej, yienzlai de mbouj dwg hat gou, gou dep henz fajciengz, nyengrwz sijsaeq caegdingq.

“Lungz Byauh, nanzdauh mwngz cungj mbouj miz saekdi liengzsim?”

“Liengzsim?” Gij sing co Aulungzgeiz, “byawz miz liengzsim? Hahaha……”

Gij sing riu hawj vunz mbei dek

ndang saenz, ca mbouj geijlai saenz deng fajciengz, doeklaeng, ndawranz caemrwgrwg, gou cingq yaek ning, cix deng gij sing gangj vah cienz okdaej haenx nyengh baez he lo.

“Gou baenzneix caennadang daej gouz mwngz lo, mwngz dapwngq luba……”

“Hix miz mwh mwngz daej gouz gou? Mwngz rox mbouj rox ngeix hwnj mwh bouxwnq gouz mwngz ne? Hw!”

“Mwngz lij caengz lumz gij saehgonq gaenq gvaq ndaej cib lai bi, heuh gou gangj maz cijnde ne?……”

Sawqmwh, gou ndaejnyi gij sing daejfwtfwt, caeuj gij sing haxbaenh Aulungzgeiz riuhaaha fanj doxdauq.

“Hix ndei, dou dauj gij vah ndawsim okdaej caez aij cij cwxcaih di, bihaenx byawz hawj mwngz hwnj bya bae——”

“Gou bae Yanghgangj lo! Byawz naeuz gou hwnj bya bae?” Aulungzgeiz maenjhumm hwnjdaej.

“Caezgya cungj baenzneix gangj——”

“Gou dak Buzsimjsam cienz vah hawj mwngz, naeuz daih'iek song bi dauqma.”

“Buzsimjsam lawz?”

“Bouxyah biz he, meh gou dak de bae ranz mwngz guhmoiz.”

“Ha, dwg bouxyah biz haenx? De dwg vih ranz bouxwnq daej guhmoiz,

baenzlawz dwg meh mwngz dak ne?”

“Baenzbaenz de gaenq dai lo. Gou mbouj caeuj mwngz gangj doenghij vah mbwq neix, gou cij cam mwngz, gou dak de cienz vah hawj mwngz, mwngz vihmaz mbouj caj gou?”

“Maz vah? De gaenbonj mbouj lwnh hawj gou gvaq ha!”

“Ha……”

“Gvaq bi ndeu, dingqgangj mwngz youh mbouj guh saeh lauxsaed, caemhcai boux mehmoiz haenx youh baenzngoeng daej ranz gou, bohme gou hix roxnyinh de gangj ndaej deng, doeklaeng——”

(caengz sat)